



職方典第一千二百五十三卷

衡州府部藝文二

南岳蓮華峯說

明王夫之

凡入蓮峯觀其簇立疊辦堆根知名之自立也凡入蓮峯四山向拱之天台揖之兩坳奔之觀音翼之前曠後窈知形之自來也凡入蓮峯亭午見日狂飆見風或屏或障或控或扶坦焉中開知寺之自基也凡入蓮峯山見幽水見咽林見未得之樹馴不畏人見猿鹿人靜道生知兩夫子之有樂乎此也山勝益備矣

衡說

丘兆麟

衡嶽位離而星熒惑夫故以火德王南土也火性燥暎假使其用尊特勁直而一其於萬物必有尅而無生而衡左右適當洞庭彭蠡之所蓄瀦長江帶焉火得水以爲制火斯不爲霸而爲王粵稽三苗正當其地擾而弗馴豈火性凶烈之驗歟然不能不革於兩階干羽之旣舞蓋自有虞氏至今閭眴光文明盛萬物相見無能踰此蓋火得水制光明齊潔有時有德有位賢明諸侯之象也乃王元

美氏因有衡嶽不如武當之說文士信之庸詎知武當高而弗大匡廬大而弗高況又區區餘分閭位火不歸垣而光旁炤佐命之烈固應遜於專制之功而乃云不如是未曙於其時其德其位也外是如潛如霍弗高弗大附庸於楚之東偏又漢武之所謂南岳非自古帝王之所謂南嶽也武帝時方專意北征是其沴在水見火而遁其應固然然天子乃自替尊上之勢於臣下以冠苴履僭端見矣厥後王氏之禍何莫非武帝之自取之此其際微矣當亦察幾之士之所務白也而況衡更有隱德四時雲氣常合其巔辟之火蘊於石傳於薪不當萬物之用常有所祕惜而不以其光輕試此先靈之所爲窟宅而神聖之所爲遨遊自古至今不可勝數也昔人五岳之遊止缺其一任爲自歎而予去歲始登嵩高今纔及此是於五嶽之遊不啻行百里之初步其任歎不知當何如然外遊目中事也內遊意中事也若以予意中敢自謂一觀於衡而天下之觀止矣有時有德有位觀衡者必以此觀之乃爲善觀衡者乎

禹碑說

王世貞

禹碑在祝融峯重刻者有二本而隸釋亦微不同大抵多以意會耳非必盡能識之也按昌黎歌科

斗拳身薤倒披鸞漂鳳泊擎虬螭是書形勢亦誠有之及讀盛弘之荊州記劉禹錫寄呂衡州書此碑流跡已久不當叅以蜉蝣之足但銘辭雖古未諧聖經極類汲冢周書穆天子傳中語豈三代之季好事者托大禹而刻之石耶然宣王石鼓文亦多類是似更有不可曉者予直以爲卽秦以前文猶勝作西京後人語而用修所謂龍畫傍分螺書扁刻不啻倍蓰嶧山瑯琊也留此以冠諸刻

愧軒記

顧憲成

昔柳子厚落職永州其所爲文詞往往有無聊之色至於蘇子瞻又何超然自得也其詩曰日啖荔枝三百箇不妨長作嶺南人可謂知所處矣予竊惟順逆時也窮通命也君子素位而行不願乎外何則以臣之事君猶子之事父也臣不得於君子不得於父所宜日夜省愆補過兢惕以將之誠懇以格之動心忍性增益不能以俟之何則以憂近歎樂近盈是故柳旣失矣蘇亦未爲得也雖然是二子者固自有說焉子厚倜儻負奇有經世心其暱於叔文輩非直冀富貴而已一旦被不祥之名將何以堪子瞻高曠拔俗不能下人人以故爭疾而中之非必上意也若是者曾不啻浮雲之過太虛何足以介於意然則子厚之憂子瞻之樂並自不苟耳且非特此也子厚誠不勝無聊卒能發憤

淬礪列於不朽與昌黎並驅則可以洗滌夙垢用自愉快消其窮愁子瞻豈不誠超然哉而忠君愛國出自天性顧坐憲直數賈譴呵俾讒邪得氣重貽主德之累則黯淡慙惻殆有甚焉者此又以知子厚之憂未嘗無樂子瞻之樂未嘗無憂非恆情可得而測也予無似自度去二子遠甚敢謬附於憂樂兩者之間惟是履任以來自監司以下率以客優之不及以政其州之耆老子弟顧居然父母我也一切供事惟謹而予無毫髮報塞間嘗與諸士有所揚摧大都不離訓詁非能益之也於是乎歸而求之卽六尺之軀猶然故吾徵發困橫總歸鹵莽又靡毫髮樹立怠其職而勤其享據其名而竊其實有愧焉而已予考州乘莊公定山亦嘗謫於此甚有德於民至今人能道說之若焦泌陽雖貴在日月之際莫之間也得失之監昭然甚明予將奚居哉庶乎柳氏之文而已蘇氏未離乎文也莊氏離乎文矣其庶乎晚年一出尙不免於忌口況其下焉者哉甚矣出處之難也予至桂無所居假館於藩大夫日起無事每坐軒中攤書而闔之撫心內問仰而無以對先哲俯而無以對耆老子弟因頷之曰愧軒爲記其說如此欲令州人知吾之過也歟

黃茅之驛馬非初制也自萬曆甲戌兩臺念衡孔道弊劫於役疏請建驛以舒吾民移安仁霞流驛之費歲輸以買馬於衡山湘潭兩邑派足其數驛所轄馬三十匹上下兩縣之間始未嘗不稱善也自安仁歲額愆期余邑人誤以夏稅與之更易中湘之馬由是不至而余邑歲代湘人爲役矣又地距衡城八十里歲率數十人裹糧從事而馬之芻茭廐棧寄之中湘中湘之民歲責其直間或馬足窺其田園不殺擊之不已馬之斃於役與斃於居民者歲不勝記也邑人困無所訴故每歲新役相代如驅湯火勢不得不於官價外議私幫矣合里每私幫百餘金總其數歲浮費二千兩通計邑中額賦不及二萬而浮費於驛者踰於二千如是民安得不困又安得不以驛爲怨府哉原夫建驛設馬以兩利也豈其獨利於湘而贏於衡耶往者邑大夫暨士民喋喋陳說驛遞不便請復故法唇舌俱焦竟無若中湘何卽當道下牒兩郡議之僅僅築道舍耳不佞目諸生切齒其事計復兩邑徑遞之額而後已上歲王侯奉命令衡山余於京師一接見之娓娓邑中興除余以馬之害吾衡者具陳於侯侯曰唯唯食土之毛而無關於民恤惡在其爲民父母也迨下車目擊苦狀詳實而有所請於上適余奉命過里中侯語予曰曩黃堡之命可幸報塞蓋計其請而必得者於是以衡民困頓驛狀

具聞當道乞賜裁撤憲使魏公嘉其議持之甚力會御史應公以巡察至集監司守令於堂問所疾苦侯獨稱驛害侃侃力說詰難百折悉中窾要左右聽者相顧驚咋御史深爲嘉納欲如故事下兩郡議侯曰議者疑也利害疑則議驛遞之爲衡深害而宜去也寧須再計乎御史曰然直從侯所請撤歸驛馬復兩邑徑遞之規原安仁協濟三百餘金以分解衡湘資其馬直著爲令旣而御史中丞命至先後一揆邑人捧檄驩聲載道侯更聚士民酌議其後以前驛馬之半移而應役於縣合新舊馬若干疋以待上下之乘傳至者邑人稽首稱善以書屬不佞俾記其事於石使不忘侯之大德世世守其法毋壞也余謂王君誠賢者也賢者治民視其害如痼癰之於身剔之而後已今夫驛馬之蠹吾民無故而歲捐二千餘金代他邑爲役約之廢中人之產二百家也侯撤而歸之使歲無溢出其存中人之產者不啻二百家乎吾民無奸其法世世奉率積其存活蓋千萬於斯矣是宜邑人尸而祝之比於畏壘者也然惟余追維往事之失孰使我輕易其稅而以成安仁之巧耶孰使我獨受其勞而以遺湘潭之逸耶其爲此者實我民耳嗟嗟令出於上澤竭於下一二市猾窟據其中欲任不任欲釋不釋挾爲艱苦以恣中飽非遇神君懸大鏡以出照挾神劍而議割安能力拔其害以垂

長利哉吾民鑒此前轍無墮谿壑其念吾侯者安得不世世也昔黃帝問治於襄城童子童子曰夫爲天下亦奚以異於牧馬者邪亦去其害馬者而已矣侯用治余邑者出相天下天下亦猶之乎衡也侯名寅時字起東慈谿人登浙戊子賢書萬曆癸卯季夏穀旦

請裁黃堡驛馬弊書

前人

衡山蕞爾下邑水陸交衝土瘠民貧俗陋人愚長於奉法而短於避禍惟是黃堡馬驛一事遺害已極被困不堪一路之哭酸辛靡控敬具陳顛末代爲請命惟當道大人少加憐焉竊照衡湘二縣自國初以來各就長馬上下徑遞行之二百年矣未聞所謂馬驛者馬驛之設蓋自萬曆末年始也緣長民者偶觸力役之疲當道者欲疏壅滯之虞不知法久必弊役久必玩就中稍加振刷豈無善道而謬爲更張議將本縣霞流水驛改於湘潭之黃茅堡以爲馬驛而名之曰黃茅驛夫設驛馬三十匹內衡山議編九匹湘潭議編八匹又將安仁原編霞流水驛站力工食三百一十餘兩准馬十三匹三縣共三十四匹各縣各當彼此無混驛官第取辦供應而已不爲轄馬也顧馬雖三縣共遞驛則湘潭地方而驛之官吏乃屬衡山凡兩縣違悞者必責償於衡後因安仁閃躲接遞不及致使上司

嗔怒責令衡山替役令安仁止認解銀然官價走馬實不能敷而安仁里甲亦於價外賠幫本縣雖替役尙堪支也至萬曆九年奉文裁革里長於二十四兩之外毫無私幫而馬始困矣其後安仁日益玩視并官銀不依時解致馬戶賠累告擾當事者誤聽奸猾某某乘機賄蔽遂將本縣夏稅銀兩與之撥換於是安仁代衡山解夏稅衡山代安仁走馬自後安仁所編本驛腳馬無其實并泯其名矣萬曆二十年更定全書復派衡山加驛馬三匹而於湘潭縣反減三匹於是衡山驛馬增至二十五匹湘潭漸減至五匹此日困日增彼日逸日減不知官長何所甚憎而獨困此一方民也後又奉議將本驛馬裁革六匹衡山存二十四匹湘潭存四匹湘潭名雖四匹其實抗頑多不赴役而往來馬遞其責盡屬之衡山矣馬戶力不支而小民之私幫愈增至今每馬一匹除官價三十兩之外民間私幫增至一百二十五兩合二十四匹其私幫銀二千三百兩破家蕩產鬻妻賣子以償此額外無名之役今民困已不聊生而馬戶半歲之外尙多逃竄又不得不責償於小民縱欲瞞眼前瘡而百姓心頭已無肉可剜矣細思此驛之設於事理之不均者四小民之受害者四馬戶之不便者三請得而終言之自湘潭縣八十里而至黃堡驛又五十里而至柘塘鋪而至衡山其屬地方纔三十里耳

道路之相去可謂懸殊今以一百三十里者出馬四匹而三十里者出馬二十匹多寡輕重倒置如此其不均者一也衡山路當孔道南走兩廣北走荆襄又有醴陵攸縣安仁湘潭四處小路不時卒至又有南嶽祝融遊覽紛沓諸如此類車馬絡驛靡有息肩今編驛馬九匹猶云本縣應供耳乃未幾而責使代安仁之十三匹又未幾而責使代湘潭之三匹夫二縣咸蒙軫念衡山何獨重困其不均者二也自驛未設之先兩縣長馬徑遞此往彼來未有差等今驛在湘潭之地官吏應屬湘潭卽不然亦當調停適均毋使偏累自官吏屬衡而廚傳之供億館舍之修葺無不屬之衡者以兩縣應供之役而損一縣之物力以徇之其不均者三也旣設黃堡馬驛下之接遞湘潭上之接遞衡山馬之應役與縣無殊今驛馬裁爲二十四匹而湘潭四匹又不用命則驛馬旣不能當縣馬之半矣而縣馬之至於驛者照數對遞其多寡又復不異矧該驛去縣遼遠所遇不良使差勒索措馬等銀數倍於縣莫敢喘息而當道不察猶議裁而不議增其不均者四也若夫衡民之所被四害則讀之猶可酸鼻矣自衡山誤以夏稅銀兩更換安仁馬價今共三百一十餘兩者纔足供兩馬之用耳而每歲所賠安仁者計馬十一匹約銀一千五百九十餘兩此害之大者一也其代賠安仁者猶曰作俑

於夏稅之更換耳乃減湘潭之三匹以加於衡山則不知其解矣當道大人曲徇一時之情遂爾上下其手不知衡山官價與私幫每歲賠銀四百四十兩誰作厲階至今爲梗此害之大者二也自驛馬旣敝一縣當三縣之役馬戶以驛爲阱一遇簽報刑驅以往如赴湯火復有無賴棍徒藉口重困故相推委編戶之家懼其往役寧倍加幫貼與之而此輩所領公私馬價先已花費蕩散其十之八九僅以其十之一二者祇買二三瘦弱款段之馬抵塞過客每至八九月馬斃囊空揭借無路遂至逃竄則縣官坐令編戶之家重賠雇募以畢前役一之爲甚豈可再乎此害之大者三也馬驛未設之先我往彼來上下中伙兩縣各任自有此驛而一切供應盡歸之驛如曰本縣原編霞流水驛之費足以充之然黃堡陸路之衝十倍霞流其所編增諸費皆小民額外之膏脂也至於公館司宇置自衡山者彼土之民折損盜毀雖有看司門子異縣之地軍民紛錯莫敢誰何本縣每年修理一竹一木一磚一瓦匠斲之屬咸自本縣負運以往縣官豈有神輪皆驅民之力取民之財築愁築怨控訴無門此其害之大者四也若夫馬戶之不便於驛者三此亦有足念者黃茅堡地瘠不毛野無茂草山麓田畦有草之區湘民立界稱主非有價易毫不敢犯方春稼時豪民厲禁約曰衡馬兩足下

田者賠穀五斗四足下者倍之成不認賠則繫其馬以爲質甚則重棍擊之送之遠方而馬沒入不可返矣獨牧孔艱所在爲阱一不便也黃堡地屬湘潭衡民越八十里而往役立錐之地一椽之棲賃土僦居計日而酬稍有朽毀立爲修葺矧驛地原係軍衛屯所軍民廬雜囂陵詬誶山藪荏蒲寇盜充斥往往被盜失馬不可究詰二不便也馬戶一名除正身答應上官外若背包若薊蕘若炊爨若往來探聽多者八九人少亦不下五六人日用酒米鹽茶供給皆運自八十里之外一遇風雨冰雪連日接濟不及湘民坐索倍價三不便也原夫設驛之始固曰裁不急之水驛而改設於衡湘之間庶幾以驛供官而取驛役之費供馬以佐二縣之不逮豈不謂官民長利無踰於此顧行之數年便成沮格行之十餘年而衡民大困至今竟二十餘年而衡民無不嚙指感額咨嗟太息若不能以須臾矣夫昔年以兩縣長馬徑遞至二百年而始敝則其法之可行斷可知也今馬驛之設不三十年而數變數困以至於敗壞則其法之當罷斷可知也今日衡山之事編戶與馬戶重困民力與馬力俱盡不止昔人所稱東野之御設今不改日甚一日不至驅衡山之民而逃竄流移不已也茲若不廢馬驛而官民胥便則當酌於事理之公平庶通變而可久請於驛馬仍照初設三十四之舊而

議衡湘二縣各出十五匹衡山之十五匹隸之驛官凡由衡山而下者驛官以衡山之驛馬接遞之其自湘潭而上者無與焉湘潭之十五匹隸之堡官凡由湘潭而上者堡官以湘潭之驛馬接遞之其自衡山而下者無與焉各縣各馬各縣各遞以省長馬徑遞之勞至於供應下程仍照舊例付之驛官竊以爲均兩縣之差而甦公私之困無踰此者萬一湘潭以近例多寡爲辭則請有以折之夫此驛未設之先衡山之馬徑遞湘潭矣湘潭之馬獨不徑遞衡山乎其徑遞衡山也亦有他縣爲之協濟者乎共食王土共服王事偷逸二十餘年以偏累衡山人窮反本尙安所藉口也如其堅持不下請仍復國初以來二百年之舊令二縣各以長馬徑遞蓋計程一百七十里非有甚遠夫役可行馬匹尤其可行何易於人而難於畜也矧以三十年重困之新法而較二百年久安之舊法其因革之勢旣已較然卽以新法調停而使兩縣之聚訟議論之不決則莫若使之各照舊額一彼一此不復相牽庶可服二縣之心杜偏執之口而息衡山之困也至於驛官原管支應而不管馬匹矧數年以來差使鞭笞箠楚無管馬之名而被管馬之害今馬各撤回可以全民亦可以全官而差使逼勒之害亦少息乎若夫安仁銀兩原係協濟本縣霞流水驛者似當仍歸衡山以濟馬驛之衝疲而幫

馬驛之供應似亦公平之論倘湘潭以爭幫爲辭則馬驛未設之前原無所謂私幫者既各復舊則協濟非湘潭之所得與明矣某目擊桑梓之困熟悉馬驛之害憂徒激衷愛不能助僅條陳顛末代爲本縣父老子弟控訴於大人之前伏乞詳覽

衡州府部藝文三

詩

送司馬承禎往南嶽

唐元宗

洞府修真客衡陽念舊居將成金闕要願奉玉清書雲路三天近松溪萬籟虛猶期傳祕錄來往候山輿

自湘源至潭州衡山縣

宋之問

浮湘沿迅湍逗浦凝遠盼漸見江勢闊行嗟水流漫赤岸雜雲霞綠竹緣溪澗向背羣峯轉應接良景晏沓嶂連夜猿平沙覆陽鴈紛吾望闕客歸橈速已隕中道方泝洄遲念自茲撰賴欣衡陽美持以蠲憂患

耒陽溪夜行

張九齡

乘夕棹歸舟緣源路轉幽月明看嶺樹風靜聽溪流嵐氣船間入霜華衣上浮猿聲雖此夜不是別家愁

夜渡湘江

孟浩然

客行貪利涉夜裏渡湘川露氣聞芳杜歌聲識采蓮榜人投岸火漁子宿潭烟行侶遙相問潯陽何處邊

贈衡山麋明府

前人

爲縣瀟湘水門前樹配苔晚吟公籍少春醉積林開滌硯松江起擎茶嶽影來任官當此境更莫夢天台

同王昌齡送族弟襄歸桂陽

李白

秦地見碧草楚謠對清樽把酒爾何思鷓鴣啼南園余欲羅浮隱猶懷明主恩躊躇紫宮戀辜負滄洲言終然無心雲海上同飛翮相期乃不淺幽桂有芳根

送陳郎將歸衡

前人

衡山蒼蒼入紫冥下看南極老人星回飈吹散五峯雪往往飛花落洞庭氣清嶽秀有如此郎將一家拖金紫門前食客亂浮雲世人皆比孟嘗君江上送行無白璧臨岐惆悵若爲分

送族弟襄歸桂陽

前人

爾家何在瀟湘川青沙白石長江邊昨夢江花照江國幾枝正發東窗前覺來欲往心悠然夢隨越鳥飛南天秦雲連山海相接桂水橫烟不可涉送君此去令人愁風帆茫然隔河洲春潭瓊草綠可折西寄長安明月樓

贈嵩山焦鍊師

并序

前人

嵩丘有神人焦鍊師者不知何許婦人也又云生於齊梁時其年貌可稱五六十常胎息絕穀居少室廬遊行若飛倏忽萬里世或傳其入東海登蓬萊竟莫能測其往也余訪道少室盡登三十六峯聞風有寄灑翰遙贈

二室凌青天三花含紫煙中有蓬海客宛疑麻姑仙道在喧莫染跡高想已綿時餐金鵝藥屢讀青苔篇八極恣遊憩九垓長周旋下瓢酌潁水舞鶴來伊川還歸空山上獨拂秋霞眠蘿月掛朝鏡松

風鳴夜絃潛光隱嵩嶽鍊魄棲雲幄霓裳何飄飄鳳吹轉繇邈願同西王母下顧東方朔紫書倘可傳銘骨誓相學

江上送女道士褚三清遊南嶽

前人

吳江女道士頭帶蓮花巾霓衣不濕雨特異陽臺神足下遠遊履凌波生素塵倦尋向南嶽應見魏夫人

望嶽

杜甫

南嶽配朱鳥秩禮自百王歟吸領地靈瀕洞半炎方邦家用祀典在德非馨香巡狩何寂寥有虞今則亡洎吾隘世網行邁越瀟湘渴日絕壁出漾舟清光旁祝融五峯尊峯峯自低昂紫蓋獨不朝爭長巖相望恭聞魏夫人羣仙夾翱翔有時五峯氣散風如飛霜牽迫限修塗未暇杖崇岡歸來覬命駕沐浴休玉堂三嘆問府主曷以贊我皇牲璧感衰俗神其思降祥

過南嶽入洞庭湖

前人

洪波忽爭道岸轉異江湖鄂渚分雲樹衡山引舳艫翠牙穿裘蔣碧節吐寒蒲病渴身何去春生力